

元
詩
紀
事

元詩紀事卷十六

宮掖

侯官陳衍緝

駱妃武宗妃人

舞月歌

五華兮如織照臨兮一色麗正兮中域同樂兮萬國

元氏掖庭記已酉仲秋武宗與諸嬪妃泛月於禁苑太液池中月色射波池光映天綠荷含香芳藻吐秀游魚浮鳥競戲羣集於是畫鸞中流蓮舟夾持舟上各設女軍居左者冠赤羽冠服斑文甲建鳳尾旗執泥金畫戟號曰鳳隊居右者冠冠漆朱帽衣雪氍毹裘建鶴翼旗執漉粉雕戈號曰鶴團又綵帛結成採菱採蓮之舟往來如飛當其月麗中天彩雲四合帝乃開宴張樂薦蜻翅之脯進秋風之鱸酌元霜之酒唱華月之糕令宮女披羅曳縠前爲八展舞歌賀新涼一曲有駱妃者素號能歌趨出爲帝舞月照臨而歌云云歌畢帝悅其以月喻已賜八寶盤玳瑁盞諸妃各起賀

程一甯順帝淑妃

元氏掖庭記順帝宮嬪進御無紀佩夫人貴妃印者不下百數如淑妃龍端嬌程一甯戈小娥麗嬪張阿元支祁氏才人英英疑香兒尤見寵愛宮中稱爲七貴云

春夜吹笛詞

蘭徑香銷玉輦蹤梨花不忍負春風綠窗深瑣無人見自碾朱砂養守宮

又

牙牀錦被繡芙蓉金鴨香銷寶帳重竹葉羊車來別院何人空聽景陽鐘

案此首元文類作馬祖常宮詞首四字作華清水殿

又

淡月輕寒透碧紗窗屏睡夢聽啼鴉春風不管愁深淺日
日開門掃落花

惜春詞

春光欲去疾如梭冷落長門苔蘚多懶上粧臺脂蓋蠹承
恩難比雪兒多

元氏掖庭記程一審未得幸時嘗於春夜登翠鸞樓倚欄弄玉龍之笛吹一詞云云帝忽於月下聞之問宮人曰此何人吹也有知者對曰程才人所吹帝雖知之未召也及後夜帝復遊此又聞歌一詞云云又繼一詞云云又吹惜春詞云云歌中音語咽塞情極悲愴帝因謂宮人曰聞之使人能不悽愴深宮中有人愁恨如此誰得而知蓋不遇者亦衆矣遂乘金根車至其所審見龍炬簇擁遂趨出叩頭俯伏帝親以手扶之曰卿非玉笛中自道其意朕安得至此攜手至柏香堂命寶光天祿廚設開顏宴進兎絲之膳翠濤之酒雲仙樂部坊奏鴻韶樂列朱戚之舞鳴雉之曲笑謂審曰今夕之

夕情圓氣聚然玉笛卿之三青也可封爲圓聚侯
自是寵愛日隆改樓爲奉御樓堂爲天怡堂

凝香兒順帝才人

弄月曲

蒙衫兮蕊裳瑤環兮瓊璫泛予舟兮芳渚擊余楫兮徜徉
明皎皎兮水如鏡弄蟾光兮捉娥影露團團兮氣清風颭
颭兮力勁月一輪兮高且圓華綵發兮鮮復妍願萬古兮
每如此于同樂兮終年

天香亭歌

天風吹兮桂子香來闔闔兮下廣寒塵不揚兮玉宇淨萬
籟泯兮金階涼元漿兮進酒兔霜兮爲侑舞亂兮歌狂君
飲兮一斗雞鳴沈兮夜未央樂有餘兮過霓裳吾君吾王

兮壽萬歲得與秋香月色兮酬酹乎樽觴

採菱曲

銅楫兮文梓舟泛波光兮遠夷猶波搖兮舟不定揚余
袂兮金風競棹歌起兮纖手揮青角脫兮水濺迴歸去來
兮樂更誰

採蓮曲

放漁舟兮湖之濱剪荷柄兮折荷英鴛鴦飛兮翡翠驚張
蓮葉以爲蓋兮緝藕絲以爲衿雲光淡兮微煙生對芳華
兮樂難極返于棹兮山月明

元氏掖庭記疑香兒本部下官妓也以才藝選入
宮遂充才人帝嘗中秋夜泛舟禁池香兒着瑣里
綠蒙之衫瑣里夷名產撒哈刺蒙茸如氈毼但輕
薄耳宜於秋時着之有紅綠二色至元間進貢帝

又命工以金籠之粧出鸞鳳之形製爲十人衫香
兒得一焉又服玉河花蕊之裳于闐國烏玉河生
花蕊草採其蕊織之爲錦香兒以小艇蕩漾於波
中舞婆娑之隊歌弄月之曲云云帝復置酒於天
香亭香兒復易服趨亭前昂鸞縮鶴而舞乃歌云
云京城北三十里有玉泉山帝於夏月嘗避暑於
北山之下曰西湖者其中多荷蒲菱芡帝以文梓
爲舟伽南爲楫隨風輕漾又作採菱小船縛綵爲
棚木蘭爲槳命宮娥乘之以采菱爲水戲時香兒
亦在焉帝命製採菱曲使篙人歌之遂歌水面剪
青之調云云篙人歌之聲滿湖上天色微曛帝乃
周遊荷間取荷之葉或以爲衣或以爲蓋又命作
採蓮之曲於是調折新荷而歌云云

順帝宮人

絕筆詩

君王慧性被奸迷妾曾三諫觸閨墀不能死守身先遁致
令鐘移社稷墟

逐鹿記元宮人至京師將籍之以給令後宮有一人不屈上言爾即守節何不死於元時此女對曰願明一言而死以爲有名鬼耳上令左右以紙筆與之女寫云云擲筆投地而死

元詩紀事卷十七

閨閣

侯官陳衍緝

管道昇字仲姬一字瑤姬吳興人趙孟頫妻至大四年

封吳興郡夫人延祐四年加封魏國夫人

松雪齋集天子命夫人書千文勅玉工磨玉軸送
秘書監裝池收藏因又命余書六體爲六卷雅亦
書一卷且曰令後世知我朝有善書婦人且一家
皆能書亦奇事也又嘗畫墨竹及設色竹圖以進
亦蒙聖獎賜內府上尊酒
卿嬈記管夫人性嗜蘭梅下筆精妙不讓水仙有
時對庭中修竹亦自興至不能自休
荻樓雜抄吾竹房嘗題其所畫竹石竹房有一私
印是好嬉子三字即以此印倒用於跋尾人皆以
爲竹房之誤魏公見之曰這嬉子道婦人曾作畫
倒好嬉子

自題竹石

元韻紀事卷十七

暮嶂遠含青春光帶空碧細看風前枝拋書枕蘿石

好古堂書畫記又趙氏一門木石蘭竹卷一爲子昂古木石竹法唐人款云子昂作與淑安三娘一爲管夫人竹石自題云云一爲仲穆蘭竹三幀皆有會稽馬氏圖書蓋其所裒集也

漁父詞

遙想山堂數樹梅凌寒玉蕊發南枝山月照曉風吹只爲清香苦欲歸

南望吳興路四千幾時回去雪溪邊名與利付之天笑把漁竿上釣船

身在燕山近帝居歸心日夜憶東吳斟美酒繪新魚除却清閒總不知

人生貴極是王侯浮利浮名不自由爭得似一扁舟弄月

吟風歸去休

清河書畫舫吳興郡夫人不學詩而能詩不學畫而能畫得於天者然也此漁父詞皆相勸以歸之意無貪榮苟進之心其與老妻強顏道幾髯未全斑何苦行吟澤畔不近長安者異矣皇慶二年十二月十八日子昂書

句

山廼新綺閣竹掩舊朱門

池北偶談祁縣戴楓仲藏管夫人道昇小畫一幀有細書十字云云

杜氏婦

北行詩

北行幼女別鄉閭一似昭君遠嫁胡默默一身離故國區區千里逐征夫慵拈簫管吹羌曲懶繫羅裙舞鷓鴣多少

眼前悲泣事不堪花柳舊江都

山房隨筆杜氏婦作北行詩云云此等多有戲作題之驛亭以爲美談

余氏台州人

寄夫詩

妾誰怨兮薄命一氣孔神兮化生若甌春山娟兮秋水淨
秉貞潔兮妾之性聊復歌兮遣興

夜夢兮食梨命靈氛兮與子占之曰行道兮遲遲斂角枕
兮榮如風動帷兮心而悲

雲黯黯兮雪飛棘夫子介兮如石苦復留兮不得望平原
兮太息涕泗橫兮沾臆

送子去兮春樹青望子來兮秋樹零樹有枝兮枝有英我

胡爲兮熒熒子在此兮山城

織女兮牛郎豈謂化兮爲參商欲徑度兮河無梁霜露侵襲兮病偃在牀嗟嗟夫子兮誰與縫裳

梧溪集余季女善屬文當元盛時贅同郡水宗道水具見余才邁柳絮學不若彼辭歸閉門讀書余裁九章招之水卒不聽及余病且死水夢余訣別既訖至今存五章云云

吳氏

和鄭生

慈親未識意如何不肯令君畫翠蛾自是杏花開較晚梅

花占得舊情多

詳鄭禧下

孫淑字蕙蘭新喻傅若金妻

句

露下庭梧葉風吹月桂花
登樓聞過雁開戶見棲鴉
繡簾當雪捲銀燭背風然
雪晴山顯翠風暖水生紋
萱草當階綠櫻桃落地紅
芍藥開時病荼蘼落處愁
玉釵簪茉莉羅扇繡芙蓉
窗前垂柳分春色鏡裏幽蘭
對曉粧花間影過那知燕
柳外聲來不見鶯慈親教
婢回金剪嬌妹嗔人奪繡
鍼妝成寶鏡楊花過行出
珠簾燕子歸自傾瓮裏春
泉水親灌階前石竹花
海棠帶雨臙脂重楊柳凝煙
翡翠濃

輟耕錄傳汝礪先生嘗志其妻墳云云及序其遺稿云故妻孫氏蕙蘭因其弟受唐詩家法於庭取而讀之得其音格輒能爲近體五七言語皆閒雅可誦非苟學所能至者然不多爲又恒毀其藁家人或竊收之既卒家人哭而稱之因出其稿得五言七首七言十一首未成章者廿六句特爲編集

鄭允端字正叔吳郡人同郡施伯仁妻

桃花集句

細雨春寒江上時
小桃欹樹出疎籬
從教一簇開無主
終不留題崔護詩

列朝詩集楊循吉吳中往哲記云女秀一人李氏洪武間人有集一卷警句曰桃花一簇云云此詩載鄭氏肅雝集中錢惟善及杜寅爲敘傳曰鄭氏居吳中號花橋鄭家嫁同郡施伯仁能詩文至正丙申妖兵據城家爲盜所破年三十得疾卒君謙博學多聞而此詩屬諸李氏豈偶失考耶

張妙淨字惠蓮錢塘人居姑蘇春夢樓號自然道人

西湖竹枝詞

憶把明珠買妾時
妾起梳頭郎畫眉
郎今何處妾獨在
怕見花間雙蝶飛

詳燕不花下

張玉娘字若瓊松陽人許字中表不果而卒有蘭雪集

山之高三章

山之高月出小月之小何皎皎
我有所思在遠道一日不見
兮我心悄悄

采苦采苦於山之南
忡忡憂心其何以堪

汝心金石堅
我操冰霜潔
擬結百歲盟
忽成一朝別
朝雲暮雨心去來
千里相思共明月

草木子近時有一婦人姓張氏不知誰氏之女也
善屬文嘗寄外兄弟一詩云云又云云明月之詩
美則美矣未免桑間濮上之音爾
案蘭雪集此二首係玉娘詩草木子未詳

曹妙清字比玉

西湖竹枝詞

美人絕似董嬌嬈家住南山第一橋不肯隨人過湖去月
明夜夜自吹簫

西湖竹枝集士女曹妙清字比玉自號雪齋錢塘
人善鼓琴工詩章二十不嫁而風操可尚觀其所
賦竹枝詞可識其人焉行書點畫皆有法度嘗寫
詩寄予答之云紅牙箏帶紫狸毫雪水初融玉帶
袍寫得薛濤萱草帖西湖紙價頓能高

劉氏

寄衣詩

情同牛女隔天河又喜秋來得一過歲歲寄郎身上服絲
絲是妾手中梭剪聲自覺和腸斷線脚那能抵淚多長短
只依先去樣不知肥瘦近如何

輟耕錄洞庭劉氏夫葉正甫久客都門因寄衣作
以詩云云

韓氏

答外

碧紗窗下折緘封一紙從頭徹底空料想僊郎無別意憶
人長在不言中

詩話雋永士人郭暉因寄安問誤封一白紙去細
君得之乃寄一絕云云

山堂肆考元吳仁叔妻韓氏仁叔業大學寄簡於
妻妻折簡乃白紙一幅遂題詩返附之云云仁叔
得詩大披賞之復答以詩

李氏

巴家富

誰道巴家富
巴家十倍鄒
池中羅水馬
庭下列蝸牛
燕麥紛無數
榆錢散不收
夜來添驟富
新月挂銀鈎

詩話雋永李黨學次女適巴長適鄒巴貧甚李亦安之嘗戲作詩云云

山堂肆考元時李氏女適巴長卿甚貧女亦安之諸姊妹中有適鄒者甚富而笑之巴妻遂作巴家富詩

案以上二詩據肆考顯係元人而亦見崖下放言又疑宋人前首一詩放言作郭暉妻而肆考以爲吳仁叔妻并著其爲韓氏與仁叔業太學復答以詩各等語則較詳而當別有所據矣其亦見放言者或後人誤躡入也

萬氏

詠枕上綉梅

灑灑英標別一奇
歲寒心事有誰知
妾心正欲同貞白
枕上殷勤綉一枝

草木子處之龍泉縣飛溪李君問妻萬氏守節不再適詠枕上綉梅詩云云

趙氏

謝世詩

九重縹緲黃金闕
十二玲瓏白玉樓
明朝了却人間夢
獨跨青鸞自在遊

梧溪集南臺掾趙晉女生而多病愛讀列仙傳人請婚輒謂母辭之一夕題詩云雲端坐而逝

陳氏

聞雁

浪喜燈花落又生
夜寒頻放剪刀聲
游鴻不寄征夫信
顧

影娉婷無限情

梧溪集有婦陳題於華亭戍壁陳儒家女夫本縣曹吏因兵亂隸軍籍久在外

曠家婦

題壁

涇渭能分濁與清妾身豈肯墮風塵
孤兒未必從他姓一女何曾侍二人
白刃自傷心似鐵黃泉要見骨如銀
深山落日猿啼處過客聞之亦慘神

草木子至正壬辰紅巾盜起江西吉安敖城曠家婦爲盜所得欲妻之婦乃先刃其子題詩於壁亦自盡

案江西通志作廬陵人曠維禎妻

徐綵鸞

被掠詩

萬水千山去路賒青鞋踏破幾層沙登山絕頂重逢嶺渡
水尤深又復涯雁字只傳夫與子魚書難寄母和爺回頭
遙望鄉關處雲下峯前是我家

草木子至正乙未青田寇侵浦城西北隅徐嗣元
女爲所掠嘗作詩云云寫顛沛流離之狀

句

惟有桂林橋下水千年照見妾心清

浦城縣志徐綵鸞字叔和浦城人徐嗣源之女李
文景妻略通經史每誦文天祥六噫歌歔歔泣下
至正十五年青田賊寇浦城氏從父逃山谷間俱
爲賊所掠賊持刀欲害其父氏直前願代父死賊
乃釋父而繫氏氏顧語父曰兒義不受辱必死父
可速去賊拘氏至桂林橋氏拾炭題詩壁間云云
遂厲聲罵賊投橋下賊競出之旣而乘間復投水
死

劉氏

賦庭柏

羣卉枯落時挺節成孤秀既保歲寒心不在遐年壽

山西通志張思孝妻華氏善詠爲貂高兵所執以
不受辱見殺其婦劉氏乃僵壓姑尸大罵不已兵
併殺之後家人殮其屍姑婦之手猶相持不釋劉
有賦庭柏自況詩云云

何氏

裂帛題詩

妾長朱門十九春豈期今逐虜囚奔失身無補君王事死
節難酬夫壻恩江靜從教沈弱質月明誰與弔歸魂只愁
父母難相見願與來生作子孫

草木子元至正間衢州陷龍游有一大家婦何氏
爲兵所掠裂帛題一詩云云書畢即投於江而死

胡妙端

元詩紀事卷十七

八

嚙指題壁

弱質空懷漆室憂
搜山千騎入深幽
旌旗影亂天同慘
金鼓聲淫鬼亦愁
父母劬勞何日報
夫妻恩愛此時休
九泉有路還歸去
那個雲邊是越州

輟耕錄越縣剡溪胡氏諱妙端適同邑祝某至正庚子春爲苗獠虜至金華縣將妻之義不受辱乘間嚙指血題詩壁上已赴水而死獠帥服其節爲立廟祀之詩云云

董淑貞餘千人譚友妻

托歌

天蒼蒼兮不晉家
造地茫茫兮不吾身
容不造不容托乎
火以相從

江西通志紅巾亂友與父母兄弟被殺土渠欲汚之作托歌云云乃縱火入烈燄死

薛蘭英蕙英吳郡人

蘇臺竹枝山十首

姑蘇臺上月團團姑蘇臺下水潺潺月落西邊有時出水
流東去幾時還
館娃宮中麋鹿遊西施去泛五湖舟香魂玉骨歸何處不
及真孃葬虎邱
虎邱山上塔層層靜夜分明見佛燈約伴燒香寺中去自
將釵釧施山僧
門泊東吳萬里船烏啼月落水如煙寒山寺裏鐘聲早漁
火江楓惱客眠

洞庭金柑三寸黃笠澤銀魚一尺長東南佳味人知少玉

食無緣進上方

荻棟抽筍棟花開不見河豚石首來早起腥風滿城市郎
從海口販鮮回

楊柳青青楊柳黃青黃變色過年光妾似柳絲易憔悴郎
如柳絮太顛狂

翡翠雙飛不待呼鴛鴦並宿幾曾孤生憎寶帶橋頭水半
入吳江半太湖

一綯鳳髻綠於筠八字牙梳白似銀斜倚朱門翹首立往
來多少斷腸人

百尺高樓倚碧天闌干曲曲畫屏連儂家自有蘇臺曲不
去西湖唱采蓮

剪燈新話吳郡富室有姓薛者至正初居於閭閻門外以糴米爲業有二女長曰蘭英次曰蕙英皆聰明秀麗能爲詩賦遂於宅後建一樓以處之名曰蘭蕙聯芳之樓有詩數百篇號聯芳集時會稽楊鐵厓作西湖竹枝曲和之者百餘鏤板書肆二女見之笑曰西湖有竹枝曲東湖獨無竹枝曲乎乃製蘇臺竹枝曲十章云云

賈娉娉字雲華

集唐絕句十首

兩行清淚語前流
千里佳期一夕休
倚柱尋思倍懊恨
寂寥燈下不勝愁

相見時難別亦難
寒潮惟帶夕陽還
釵蟬金雁皆零落
離別煙波傷玉顏

倚欄無語倍傷情
鄉思撩人撥不平
寂寞閒庭春又晚
杏花

花零落過清明

自從消瘦減容光
雲雨巫山枉斷腸
獨宿空房淚如雨
秋宵只爲一人長

紗窗日落漸黃昏
春夢無心只似雲
萬里關山音信斷
將身何處更逢君

一身憔悴對花眠
零落殘魂倍黯然
人面不知何處去
悠悠生死別經年

眞成薄命久尋思
宛轉蛾眉能幾時
漢水楚雲千萬里
留君不住益淒其

魂歸冥漠魄歸泉
却恨青蛾誤少年
三尺孤墳何處是
每逢寒食一潸然

物換星移幾度秋
鳥啼花落水空流
人間何事堪惆悵
賤同歸土一坵

一封書寄數行啼
莫動哀吟易慘悽
古今來只如此
幾多紅粉委黃泥

剪燈餘話魏鵬父巫臣延祐初參政江浙行省父卒歸襄陽至正間母命之錢塘出書一緘令訪故賈平章鈞眷莫夫人生私啟其封知與彼有指腹之約抵杭取書投上因見女名娉娉字雲華者夫人令爲兄妹呼留生住前堂外東廂房娉娉亦厚屬生二人時有出入唱和得會合於娉娉處後生回應鄉試領高薦中會闈廷試又在甲榜授翰林應奉心念雲華因求外補夫人以生少年高擢歎歷仕途若以歸之勢必攜去喻生使他圖娉娉銜恨死先以手書囑春鴻寄謝魏生折覽之乃集唐人詩成七言絕句十首云云

元詩紀事卷十八

女冠

侯官陳衍緝

元氏

詠天花板

補天手段暫施張
不許纖塵落畫堂
寄語新來雙燕子
移巢別處覓雕梁

誠齋雜記元遺山妹爲女冠文而艷張平章當揆欲娶之使人囑裕之辭以可否在妹張喜自往訪觀其所向至則方自手補天花板輟而迎之張詢近日所作應聲答云云張悚然而出

紀事卷十九

妓女

侯官陳衍緝

徐氏

座上題詩

平康巷裏掌中身
翠舞珠歌玉樹春
不得簪除今義死
天教娼婦愧降臣

元史類編徐娼婦不知何許人紅巾寇常州有叛將召婦佐飲婦憤懣不聽指使題詩座上云云叛將寸磔之案梧溪集以爲龍江章璠孟文詩未知孰是

羅愛卿嘉興名妓

凌虛閣避暑玩月四首

畫閣東頭納晚涼
紅蓮不似白蓮香
一輪明月天如水何

元詩紀事卷十九

處吹簫引鳳凰

月出天邊水在湖微瀾倒浸玉浮圖
寒簾欲共嫦娥語却恨林間鳥亂呼

手弄雙頭茉莉枝曲終不覺髻雲欹
珮環響處飛仙過願借青鸞一隻騎

曲曲欄干正正屏六銖衣薄嬾來凭
夜深風露涼如許身在瑤臺第一層

剪燈新話郡中名士嘗以季夏望日會於鷺湖凌
虛閣避暑翫月賦詩愛卿先成四首坐間皆閣筆
詩云云

暨氏

句

多情樵牧頻簪髻無主蜂鶯任宿房

七修類稿元末建安暨氏女十歲能詩人令賦野
花云云識者知後不潔此即薛濤父慨然之事後
果然

元詩紀事卷二十

藩屬

侯官 陳衍 緝

阿璫主段功妻以下滇南

愁憤詩

吾家住在雁門深一片閒雲到滇海心懸明月照青天青

天不語今三載欲隨明月到蒼山悞我一生踏裏彩錦被名也

吐嚕吐嚕段阿奴吐嚕可惜也施宗施秀同奴歹歹好不雲片波

鱗不見人押不蘆花顏色改押不蘆北方起死回生之草肉屏獨坐細

思量肉屏駝背也西山鐵立霜瀟灑鐵立松林也

滇載記九代總管段功至正十三年繼立為總管明玉珍自將紅巾攻雲南梁王及憲司官皆奔威

楚諸部悉亂功敗紅巾梁王深德功以女阿璫妻之其大理夫人高氏寄樂府促之歸功得書乃歸

既而復往梁人私語梁王曰段平章復來大有吞
金馬嘶碧雞之心矣蓋早圖之梁王密召阿蓋命
之曰親莫若父母寶莫若社稷功今志不滅我不
已脫無彼猶有他平章不失富貴也今付汝孔雀
膽一具乘便可毒殪之主潛然受命夜寂私語平
章曰我父忌阿奴願與阿奴西歸因出毒貝示之
平章曰我有功爾家我趾蹶傷爾父爲我裹之爾
何造言至此三諫之終不聽明日邀功東寺演梵
至通濟橋馬逸因令蕃將格殺之阿蓋聞變失聲
哭曰昨瞑燭下纔講與阿奴雲南施宗施秀煙花
殞身今日果然阿奴雖死奴不負信黃泉也欲自
盡梁王防衛者乃萬方主愁憤作詩云云

楊淵海

題壁

半紙功名百戰身不堪今日總紅塵死生自古皆由命禍
福于今豈怨人蝴蝶夢殘滇海月杜鵑啼破點蒼春哀憐
永訣雲南土錦酒休教灑淚頻

滇載記平章從官員外楊淵海亦題詩粉壁飲樂而卒詩云云梁王愛淵海之才繼意欲爲己用見詩痛悼乃厚恤之

段寶

寄梁王

烽火狼煙信不符
驪山舉戲是支梧
平章枉死紅羅帳
員外虛題粉壁圖
鳳別岐山祥兆隱
麟游郊藪瑞光無
自從界限鴻溝後
成敗興衰不屬吾

滇載記大理十代總管段寶功之子明玉珍復侵善闡梁王遣叔鐵木的罕借兵大理時寶已長答書云殺虎子而還喂其虎母分狙栗而自詐其狙公假途滅虢獻璧吞虞金印玉書乃爲釣魚之香餌繡閨淑女自設掩雉之網羅况平章已亡兄弟齧絕今止遺一嫠一奴奴再贅華黎氏嫠又可配阿禮地如此事諾必借大兵如其不可待金馬山換作點蒼山昆明池改作西洱河時來矣書後附

以詩云云梁王見而恨之

段僧奴

寄兄詩二首

珊瑚勾找出香閨滿目潸然淚濕衣冰鑑銀臺前長大金
枝玉葉下芳菲烏飛兔走頻來往桂馥梅馨不暫移惆悵
同胞未忍別應知含恨點蒼低

何彼穠穠花自紅歸車猶別汧河東鴻臺燕苑難經目風
刺霜刀易塞胸雲舊山高連水遠月新春疊與秋重淚珠
却似通宵雨千里關河幾處逢

滇載記平章女僧奴志恒不忘父讎將適建昌阿
黎氏出手刺繡文旗以與寶曰我自束髮聞母稱
父冤恨非男子不能報此旗所以識也今歸夫家
收合東兵飛檄西洱汝急應兵會善闡又作詩二

首云云

陳日照

以下安南

宋史吳昌卒無子以女昭聖主國事遂爲其婿陳曰吳所有

案吳昌李氏安南國王

元史安南列傳憲宗三年烏蘭哈達兵次交趾北先遣二人往諭之不返乃分道進兵遂入其國八年曰吳傳國於長子光昌光昌遂納款案史作曰吳而齊東野語安南傳皆作日照

句

池魚便作

鳥鵬

化燕雀安知鴻鵠心

齊東野語安南國王陳日照者本福州長樂邑人姓名爲謝升卿少有大志不屑爲舉子業間爲歌詩有云云類多不羈語

陳日照光昌子元世祖時自立薨諡聖王道號大虛子

安南傳元兵凡三破國殺獲幾十萬然終不可久而日烜亦進代身金人贖罪詔止不伐

遊天長故鄉

景清幽物亦清幽一十仙洲此一洲百部笙歌禽百舌千行奴僕橘千頭月無事照人無事水有秋涵天有秋四海已清塵已淨今年游勝去年游

南翁夢錄陳氏第二代王曰聖王既傳位世子晚年頗閒適當游天長故鄉有詩云云此詩作時蓋經元軍兩度征伐之後國中安樂故結意如此其命意清高疊字振響非老於詩者焉能道此

陳日烜日烜子諡仁王

南翁夢錄仁王既傳位世子乃出家脩行刻苦精進爲一方祖師庵居安子山紫醫峯自號竹林大士

詠梅

五出圓葩金撚鬚珊瑚沈影海鱗浮個三冬白枝前而此
一瓣香春上頭甘露歌凝癡蝶醒夜光如水渴禽愁嫦娥
若識花佳處桂冷蟾寒只麼休

山房漫興

誰縛更將求解脫不凡何必覓神仙猿閑馬倦人應老依
舊雲莊一榻禪

是非言逐朝花落名利心隨夜雨寒花盡雨晴山寂寂一
聲啼鳥又春殘

南翁夢錄竹林大士詠梅云云其清新雄健迥出人表千乘之君趣興如此誰謂人窮詩乃工乎又山房漫興二絕句云云其瀟灑出塵長空一色騷情清楚楚逸足超羣有大香海印集頗多絕唱惜其地遭兵火不得流傳余只記誦一二而已

口占

紅潤剝龜脚黃香炙馬鞍山僧持淨戒同坐不同餐

南翁夢錄陳太上之孫名道載號文肅者仁王之從弟仁王出家一時入城文肅來謁命官廚以海味食之笑語盡歡王口占云云觀其君臣兄弟相得如此足感激也

陳日燿日焯子諡明王

案南翁夢錄安南陳氏第八代王諱叔明明王第三子知明王爲第七世而安南傳云日燿卒子曰套嗣曰套卒子曰燿嗣曰燿卒子曰焯嗣曰焯卒子曰燿嗣曰燿爲第三世知第七世名曰燿

賜范邁

臺烏久矣噤無聲整頓朝綱事匪輕殿上昂藏騰虎氣男兒到此是功名

南翁夢錄明王叔父爲上宰傳國柄不避嫌疑且與宰執有隙適仇人上變告誣搆上宰國相率百

官彈劾議置大辟獨范邁爲御史中丞固請緩獄
慎刑時上宰被收而家臣僚屬親戚奴僕下獄殺
戮甚衆邁連上諫疏面折法司辯析冤屈人主威
怒之前力爭不已王叔旣幽死後得誣搆實跡坐
其姦人王甚慚愧追贈叔父極隆乃賜邁詩云云

陳遂號岑樓

句

簑笠五湖榮佩印桑麻數畝勝封侯

詳阮忠彥下

阮聖訓

句

巢鳥寄林休伐木蟻封在地未耕田

南翁夢錄澄太父之外祖曰阮公諱聖訓事陳仁
王爲中書侍郎性甚仁厚少年登高科最能詩當
時無敵後人稱爲南方詩祖嘗有田園漫興詩其
一聯云云識者歎其仁心及物必有餘慶後其女

配我曾祖生大父及陳明王次妃妃生藝王卒有贈典尊榮門閥

范五老

絕句

橫槊江山恰幾秋三軍貔虎氣吞牛男兒未了功名債羞聽人間說武侯

南翁夢錄范五老事陳仁王爲殿帥上將軍平生出身戎行頗好讀書儻有大志喜吟詩於武事若不經意然所領軍必爲父子之兵每戰必勝嘗有詩云云

陳元旦

寄臺中寮友

臺端一去便天涯回首傷心事事違九陌塵埃人易老五湖風雨客思歸儒風不振回無力國勢如懸去亦非今古

興亡真可鑒諸公何忍諫書稀

南翁夢錄至正間交趾陳元旦以陳家宗胄仕裕王爲御史大夫王不勤政權臣多不法元旦數諫不納裕王沒其姪昏德嗣立時事愈甚元旦上書不報乃乞骸骨而去有寄臺中寮友云云

范邁

絕筆

自從謫落下人間六十餘年一瞬看白玉樓前秋夜月朝

真依舊傍闌干

南翁夢錄范邁本姓祝氏交趾莊仁人也兄名堅弟名固皆少年登高科有才名至正間在陳明王歷官清要王以祝氏古無顯人乃改祝堅爲范邁固爲范邁邁遷衆知政事在政府多年有清名一日微恙索筆題詩云云書畢擲筆而逝有鏡溪詩集行世

阮忠彥

追挽陳岑樓

平生恨不識岑樓一讀遺編一點頭
簑笠五湖榮佩印桑麻數畝勝封侯
世間此語誰能道萬古斯文去已休
欲騷魂何處是煙波萬頃使人愁

南翁夢錄陳家宗胃有號岑樓者弱冠能詩二十七歲而卒有岑樓集行于世墳在烏鳶江上介軒阮忠彥亦有詩名不及相識行過烏鳶有追挽詩云云簑笠五湖一聯是岑樓詩句也

句

介軒先生廟廊器茂齡已有吞牛志年方十二太學生纔登十六充廷試二十有四入諫官二十有六燕京使

南翁夢錄阮忠彥早有才名頗自負嘗有長篇詩其畧云云其自負矜伐如此然事陳明王歷樞要登政府卒有令名有介軒集行世

黎括字伯括清化人

送友人使元

驛路三千君據鞍海門二十我還山中朝使者滄江客君
得功名我得閒

南翁夢錄其友人爲官者當元季時奉使燕京括
送之云云識者知括將貴後括登科果驟遷擢居
政府先於其友云

陳愛山

絕句

寶鼎香消沈水煙碧紗春帳薄如蟬洞章吟罷愁成海人
在闌干月在天

又

言第...
一
牕畔香雲暗碧紗
分午睡不禁茶相思在望登樓怯一
樹木棉紅盡花

南翁夢錄陳家宗冑有號愛山者多吟小詩時有
麗句嘗有云云又云云

元詩紀事卷二十一

無名子

侯官陳衍綰

北客

宋太祖

憶昔陳橋兵變時欺他寡婦與孤兒誰知二百餘年後寡婦孤兒又被欺

詳劉因下

又

旬

萬里風霜空綠樹百年興廢又青城

癸辛雜識北客有詠汴京青城云云蓋大金之亡聚其諸王於青城而殺之

仙村人

春日田園雜興

芳草東郊外疎籬野老家平疇一尺水小圃百般花青簪
閒耕雨紅裙鬪採茶村村寒食近插柳遍檐牙

月泉吟社第四名領聯十字一毫不費力自與粘泥體者不同餘見雜興

東湖散人

前題

物色天成畫不如東風又到野人廬蜜蜂辛苦供常課
科斗縱橫學古書小雨杏花村問酒澹煙楊柳巷巾車汀洲
水暖蘆芽長更買扁舟伴老漁

月泉吟社第四十三名前聯得咏物之工後聯句法亦好末見雜興

感興吟

前題

兒結蓑衣婦浣紗
暖風疎雨趲桑麻
金桃接種連花蕊
紫竹移根帶筍芽
椎鼓踏歌朝祭社
賣薪挑菜晚回家
前村犬吠無他事
不是搜鹽定權茶

九山人

前題

軒裳一夢斷塵寰
桑柘陰陰靜掩關
種秫已非彭澤縣
采薇何必首陽山
因憐社鼓剛催老
轉覺儒冠不負閒
君看浣花臺上燕
芹泥雖好亦知還

月泉吟社第五十五名前聯就事映帶田園次聯韻度迥別末尤有趣

桑柘區

前題

粟爵瓜官懶覬覦生涯雲水與煙腴晚風一笛麥秧隴春
雨半鉏桑柘區可是樊遲宜請學肯教陶亮歎將蕪斜陽
芳草關情處更把新詩弔石湖

月泉吟社第五十六名起四字絕佳二聯分明見
田園惜尾句弔字大過

柳州

句前

稻種開包曬菊苗依譜分疇西曉耕雨舍北暮鉏雲

月泉吟社第五十七名二聯見田園分明第四句
最好曬字欠工

草堂後人

前題

桑眼已開芳晝長
西疇東墅足相羊
麥風初暖燕爭壘
林雨忽晴蛙滿塘
野老新衣逢社喜
山妻椎髻爲蠶忙
紛紛游騎踏花去
誰識吾家舊草堂

月泉吟社第五十八名第二句入田園快便前聯絕好後半篇意願

君瑞

前題

白粉牆頭紅杏花
竹槍籬下種絲瓜
廚煙乍熟抽心菜
簪火新乾捲葉茶
草地雨長應易墾
秧田水足不須車
白頭翁嫗閒無事
對坐花陰到日斜

月泉吟社第五十九名此真雜興詩起頭便見作手

青山白雲人

句前
題

遮門賸喜有桑柘輸國不憂無繭絲小婦餉耕因廢織老夫觀社忽成詩

月泉吟社第六十名領聯誼意深頸聯尤傳

無機老農

句前
題

名利有危機老於農圃宜

子問

又

驅却餘寒碎土牛田園生計又從頭

田農夫

又

桃李場中已免參只將農圃繫頭銜

唐人機軸

又

風暖柴荆鳥語幽麥高麻矮野桑柔

忘懷老人

又

寸地不可棄東風何處無

五雲山人

又

種瓜思夏實分菊待秋花

老農

又

幸存耕雨地况值養花天

石姥寄客

又

水暖眠秧珥風香豎茗旗

雙澗

又

雨露桑麻晴夜話清明花柳少年心

雲水

又

晴雨花時遊子意
寒暄秧信老農心

白雲人

又

犢外醉分芳草臥
鶯邊吟踏落花行

自家意思

又

耕鋤曉雨有餘地
應接東風無暇時

跨犢者

又

有酒便嘗烹笋蕨
無花聊自賞桑麻

缺名

又

社近記穿黃蛱子雨前趲摘紫槍茶

山野人

又

鶯藏楊柳金歌舞蝶宿梨花雪夢魂

盤隱末子

又

桃林我憶放牛日葵圃誰思逸馬時

扶杖夫

又

一生甘作扶犁手
萬變甯移抱甕心
廷雲

又

蛙鳴暮夜官何爲
蝶戀芳菲夢不知

晚靜

又

牛飲芳陂鴉立背
馬過秀野蝶隨蹄

竹簑笠翁

又

蠶一二眠催出伏
秧三四葉尙憂風

藍田道人

又

晴原望新麥一片綠雲香

才人

又

山翁不識時宜甚猶學淵明裊葛巾

月泉吟社摘句圖起句云云聯句云云結句云云

翁某

句

地下修文同父子人間讀傳各君臣

輟耕錄至元間宋文丞相有子出爲郡教授行數
驛而卒人皆作詩以悼閩人翁某一聯云云獨爲
絕唱

山堂肆考文文山二子道生佛生皆以流離中死

章某

亡治命以弟璧之子陞爲後至元皇慶中陞復仕元爲集賢學士奉使懿州道卒有挽之者云云

寄子詩

九十衰翁七子兒此時那可兩分離
客鄉已是三年別人世應無百歲期
春雁北飛頻送目夕陽西下幾顰眉
何如及早成歸計莫待山榴開滿枝

庶齋老學叢談章德元嘉溫平陽人時官延之師席偕詣京師薦除翰林編修洎職將二年其父寄以詩云云即告歸侍焉

郊居生

金銅仙人辭漢歌

神明臺些茂陵鬼六宮火滅劉郎死
芙蓉仙掌擎高秋雄

雷掣碎銅蛟髓魏宮移盤天日昏車聲轆轤繞漢門鐵肝
苦淚滴鉛水石馬尙載西風魂青天爲客驚曉別天籟啼
聲地維裂銅臺又折當塗高夜夜相思渭城月

筆精余客邵武於友人徐梧家見楊廉夫手書一卷字法蒼勁其後跋云此乃郊居生題金銅仙人辭漢歌予謂小李絕唱後萬代詞人不可著筆此生膽大而有是作也呼天籟裂地維鼎定天下見於此矣銅臺折當塗高又豈爲卽金氏感憤也哉其詩云云

白縣尹

戲題

紅紅白白好花枝盡被山僧折取歸祇有野薇顏色淺也
來鈎惹道人衣

輟耕錄嘉興白縣尹得代過姚莊訪僧勝福州間遊市井間見婦人女子皆濃粧艷飾因問從行者

或答云風俗使然少艾者僧之寵下此則皆道人
所有白遂戲題於壁云云勝見亟命去之然已盛
傳矣

蘇長公墨竹

黃陵廟前春雨足潮皐煙樹錦莫糊慟天大嘆苦無語一
女祠中叫鷓鴣

耳新費文孫家藏蘇長公墨竹老幹突兀枝葉離披卷末一詩云云作者姓字朦朧莫辨而書法委蛇有姿態要亦宋元間名筆也

聯方回詩

把酒從來不可期吾降今日少人知但看建德安民榜便是虛翁德政降

癸辛雜識回自壽詩把酒云云有輕薄子聯之但看云云

句

兩朝忠義傳俱有若人名

句

葵藿有心終向日杏桃無力謾隨風

熊勿軒集鄉牧祠內有某人者顯爲清議不容舊曾守土不死封疆姑且勿論丁丑戊寅之間反覆變詐後又夤緣一諡命下之曰有作詩諷之者云云方其反覆之際題門云云是全不知有世間羞恥事以此得朝廷爵謚又以此齒學校祀典豈不爲郡泮羞

和湯西樓

榮華富貴等浮花
簪力難勝國爪牙
漢世但知光擁立
唐朝誰識杞姦邪
綺羅化作春風蝶
絃管翻成夜雨蛙
縱有清漳人去也
碧天難挽紫雲車

山房隨筆賈秋壑敗師亡國後有人刺以詩湯西樓詩云云有和之者云云

句

山中鳥喙方嘗膽臺上蛾眉正捧心
空懷狗監知司馬
且喜龍門識李膺
生藏魚腹不見水死挽龍髯欲上天

麓堂詩話元詩云云皆得李義山遺意至戲爾築臺登大將危乎操印立眞王自是假王先賈禍非關眞主不憐才直世俗所謂簡板對耳

古銅器詩

模稜難斷佞臣頭碎腦翻成百倍憂
解使英雄生膽氣從今不用佩吳鉤

懸笥頭探予嘗至南內於戊字庫見古銅器一事如劍而無刃平直首微稜下有靶長可三尺闊僅及寸面嵌銀題云云直似宋元人作然不可考矣

天目山詩

天目山前水齧磯
天心地脈露危機
西周浸冷觚稜月
未必遷岐說果非

古杭雜記高宗中興建邦天目乃主山至度宗甲戌山崩京城騷動時有建遷蹕之議者未幾宋鼎遂移有人作詩云云

贈夏貴

自古誰無死
惜公遲四年
問公今日死
何似四年前

三朝野史至元丙子春淮西閫夏貴歸附大元宣授中書左丞至元己卯薨有贈以詩云云

弔夏貴墓

享年八十三
而不七十九
嗚呼夏相公
萬古名不朽

比事摘錄至元丙子淮南閫帥夏貴歸附元至己卯歲死有人贈以詩云云又有人弔其墓云云

譏文璧

江南見說好溪山兄也難時弟也難可惜梅花有心事南
枝向暖北枝寒

山堂肆考宋文文山死宋而其弟璧號文溪附元
當時有詩云云

贈虞伯生

萬世文章凌日表驚人風采動朝端窮經白首討論易草
詔丹墀潤色難憂國淚多雙眼暗歸田計早一身安不堪
回首昭陵道落日西風莎草寒

宋遺民錄附錄右詩得於傳聞而未句之意有不
可解者故老云伯生嘗私於文宗妃故贈者因以
譏之不知其果然否也

集古句

翡翠屏風燭影深良宵一刻值千金今夜不須睡明
日池塘是綠陰

詳祖柏下

嘲伯顏

百千萬定猶嫌少塚積金銀北斗邊可惜太師無運智不
將些子到黃泉

輟耕錄元統至元間太師丞相伯顏專權蠹政貪
惡無比以罪左遷南恩州達魯花赤至隆興卒寄
棺驛舍滑稽者題於壁云云

弔秦王伯顏

人臣位極更封王欲逞聰明亂舊章一死有誰爲孝子九
泉無面見先王輔秦應已如商鞅辭漢終難及子房虎視
南人如草芥天教遺臭在南荒

草木子後至元間太師秦王伯顏專權變法謀爲不軌貶嶺南道江西死於薦福寺遂殯於是有人以詩弔之云云蓋其在生出令北人歐打南人不許還報又欲刷子女天下騷動

悼何巨川

奇才不泄神仙事抗疏曾干世祖知每恨南邦本無罪比
留北使欲何爲忠魂久掩孤城館褒詔新鑄二品碑地上
若逢姦似道爲言故國黍離離

輟耕錄何公巨川者京師長春宮道士也會世皇將取宋乃上疏抗言宋未有可伐之罪遂命副國信使郝文忠公使江南歿於眞州至正間詔贈二品官有人作詩悼之云云

西湖竹枝詞

蘇公堤上楊柳青人來人去綰離情東風爲爾丁寧道折
斷柔條莫再生

天竺寺前開翠微
長年流水白雲飛
流水入湖無日歇
白雲出岫有時歸
詳燕不花下

嘲時政詩

舊省新丞相
新臺舊大夫
大夫聽子語
丞相愛金珠
書臺門

苞苴賄賂尚公行
天下承平得未能
二十四官徒解豸
越王臺上望金陵

輟耕錄集慶失守行御史臺移置紹興路前御史大夫納璘再任時浙省丞相達失帖木兒得便宜行事民間頗言其貪後又以大夫于安安判行樞密院護臺治大夫之政一聽決於院判有人作詩云云又有人書於臺之門云云

嘲廉訪司官

解賊一金并一鼓迎官兩鼓一聲鑼金鼓看來都一樣官人與賊不爭多

草木子廉訪司官分巡州縣每歲例用巡尉司弓兵旗幟金鼓迎送其音節則二聲鼓一聲鑼起解殺人強盜亦用巡尉司金鼓用一聲鼓一聲鑼後來風紀之司賊汚狼藉有輕薄子爲詩嘲之云云

嘲諸司

丞相做假鈔舍人做强盜賈魯要開河攪得天下鬧

草木子元之將亂上下諸司其濫愈甚又有無名子爲詩嘲之云云

弔四狀元

四榜狀元逢此日他年公論定難逃空令太守提三尺不見元戎用六韜元舉何如兼善死公平爭似子威高世間多少偷生者黃甲由來出俊髦

輟耕錄平江一驛舟中有題弔四狀元詩者不知誰所作詩云云元舉王宗哲字也至正戊子科三元進士時爲湖廣憲僉兼善泰不花字也時爲台州路達魯花赤公平李齊字也時爲高郵府知府子威李麟字時爲江州路總管此四公者或大虧臣節或盡忠王事或遇難而亡故云

句

黃金合鑄李將軍

輟耕錄元帥李其姓者杭州庚子之圍解頗著戰功一士人投之以詩將有求焉其詩有云云之句李大怒曰吾勞苦數年只是將軍今年纔得元帥乃復令我爲將軍耶命帳下策出之

嘲楊廉夫

竹枝柳枝桃花吹彈歌舞撥琵琶可憐一個楊夫子變作江南散樂家

歸田詩話楊廉夫晚年居松江有娼妾竹枝柳枝桃花杏花皆能聲樂乘大鼓勸盜意所之豪門巨

室爭相迎致人有詩云云

句

山前有客祠彭越塞上無人斬郅支

歸田詩話岳王墓詩徐孟岳云云高則誠云云少日過葛嶺憶有人題題墓上云云云和支字韻亦佳當時不能全記再過之則已壞矣

句

斜倚水開花有思緩隨風轉柳如癡

壘起雜事韓林兒母楊氏雖老而善自粧飾性頗淫見人則匿其年云四十自稱少娘又善爲嬌狀使人忘其老司徒杜遵道通焉目爲少郎自是專權怙勢人皆嫉之時有好事者榜其門云云

弔張士誠

天星夜落水犀軍又見吳臺走鹿羣睥睨金湯空自固倉

元詩紀事卷二十一

皇珠玉竟俱焚將軍只合田橫死國士嗟無豫讓聞風雨
年年寒食節麥孟誰上太妃墳

蓬窗日錄杜東原作耕餘錄有弔張士誠詩云云
不載爲何人所作疑當時有感於士誠者

不平詩

天遣魔軍殺不平不平人殺不平人不平人殺不平者殺
盡不平方太平

七修類稿輟耕錄有詩云云又嘗聞有詩云中原
不可生強盜強盜纔生不可除一盜旣除羣盜起
功臣原是盜根株二詩語意相類

元詩紀事卷二十二

卜仙

侯官陳衍緝

馬巫父

玉華山詩

玉樓雲淡曉光浮中有飛仙駕鶴游下界此時方熟睡誰尋紫氣問青牛

志雅堂雜鈔辛卯正月胡天放降仙馬巫父弋陽人地仙玉華山詩云云

三茅吳真人

絕句

深深門巷老翁家自洗銅瓶浸杏花喚起承平當日夢令人轉憶舊京華

柳杏

岸曲紛紛已弄煙園林點點欲爭然何人折取歸深院兩
樣風光在眼前

鄭文選

九洞

拖露搏風海嶠來觚稜寂寂自樓臺春光不比承平日淚
眼看花薦一杯

張君有

絕句

八千里路到杭郡城郭人民幾變遷惟有吳山青不改令
威何日是歸年

蘭渚

光轉東風弄暖天
永和人物尙依然
誰憐紉佩淒涼客
倚策愁吟楚澤邊

方武襄

賦筆

兔出中山骨欲仙
何人拔穎縛尖圓
拙夫堪笑堆成冢
豪客曾聞掃似椽
窗下玉蜍涵夜月
几間雪鬢湧春泉
當時定遠成何事
輕擲毛錐恐不然

志雅堂雜鈔二月初三日降仙三茅吳真人詩云
云柳杏云云鄭文選九洞云云張君有眉山書房
吏人云云蘭渚云云方武襄蒲人潛夫之友也今
爲大陽洞主求賦筆詩云云

王大圭

絕句

六朝盛事總成塵
結綺樓前草自春
一曲後庭何處覓
空留月伴倚闌人

志雅堂雜鈔辛卯十二月天放降仙江甯王大圭詩云云

趙靜齋

享祭降筆

生居四代將門家
不幸遭逢被虜拏
死在瓜洲無葬地
幽魂夜夜到長沙

山房隨筆趙靜齋准被執於溧陽至瓜洲被刑其孫享祭靜齋降筆云云

獨樂園主

詠史

三皇之前不可傳堯舜垂衣化自然夏衰商敗兵革起征
討有罪非傳賢蒼姬種德極深厚歷載八百何綿綿孔丘
孟軻不得位唯有文字登書編春秋筆削嚴一字誅惡褒
善持大權丘明作傳詳本末下迨戰國何茫然秦皇併吞
六王畢始廢封建迷井田功高自謂傳萬世仁義不施徒
託仙東游弗返祖龍死赤靈火德明中天漢朝文景稱至
治刑措可比成康前無端雜用黃老術是以未得稱其全
王莽賊臣篡漢祚賴有光武如周宣雲臺名將應列宿婉
婉良策扶戎軒絕勝高祖醢彭越可比周召終天年崇儒
往謁曲阜廟典章燦燦羅星躔後人不省創業苦寵任閹
宦皆貂蟬西園弼爵誠可恥黨錮忠士災何延一朝曹氏

帝稱魏銅駝荆棘生荒烟關張早死後主弱典午自帝開
坤塹五胡雲擾亂中國五馬南渡何翩翩六朝興廢有得
失豈知合併歸楊堅瓊花城裏建宮闕汴河春水浮龍船
亂離思治否復泰唐室高祖催飛鸞秦王神武不可及遂
承天祚傳高玄大綱不正有慚色我嘗撫卷思其淵紛紛
女禍握神器擾擾藩鎮橫戈鋌乘輿避亂數奔竄翠華幾
度游西川黃巢殘賊不忍說白骨山積血成泉侵凌漸使
唐祚絕江海雖大猶涓涓朱溫降將乃一賊僭號暫時得
復失後唐石晉暨知遠但以功利不尙德周家亦僭登天
基獨有世宗明治術我朝列聖皆深仁天下蒼生得蘇息
史書浩浩充屋棟人主欲觀甯遍及小臣纂集作通鑑治

亂興亡明似日願言乙夜細垂觀比美成王戒無逸

輟耕錄懸箕扶鸞所作詩文間有絕佳者友人携李顧元凱嘗召一仙至大書曰獨樂園主也可命題衆以詠史請鸞不停留作成篇云云

密蘭沙求仙詩

刀筆相從四十年非非是是萬千千一家富貴千家怨半世功名百世愆牙笏紫袍今已矣芒鞋竹杖任悠然有人問我蓬萊事雲在青山水在天

草木子至正辛未間福建廉訪使密蘭沙求仙詩云云

元詩紀事卷二十三

仙神鬼怪

侯官陳衍緝

大滌洞天仙人

示周允和

蒼然聳空碧指點人不識我來契宿緣鐫記雲根石

洞霄圖志周允和字謙甫號清溪十八歲入大滌
師沖妙先生今至元戊寅授崇道沖應清真大師
洞霄主席壬午三月兼領太一宮秋九月復還九
鎖乙酉七月初夢遊大滌洞天見數仙人吟詠一
指示云云

羽客

題蕉葉詩

午夜君山玩月回西鄰小圃碧蓮開天風香霧蒼華冷名

籍因由問汝來

白雪紅鉛立聖胎
美金花要十分開
好同子往瀛洲看雲
在青霄鶴未來

西湖游覽志元妙觀元時改今名時蕉花盛開有
趙道士居之一日羽客來訪趙適他出客題詩蕉
葉云云識者以爲呂洞賓也

水仙祠神

臨別留詩

盤塘江上是奴家
郎若閒時來喫茶
黃土築牆茅蓋屋
庭前一樹紫荆花

輟耕錄揭曼碩先生未達時多游湖湘間一日泊
舟江溪夜二鼓攬衣露坐仰視明月如晝忽中流
一櫂漸近舟側中有素粧女子徽袵而起容儀甚
清雅先生問曰汝何人答曰妾商婦也良人久不

歸聞君遠來故相迎耳因與談論皆世外恍惚事
且云妾與君有夙緣非同人問之淫奔者幸勿見
却先生深異之迨曉戀戀不忍去臨別謂先生曰
君大富貴人也亦宜自重因留詩云云明日舟阻
風上岸沽酒問其地即盤塘鎮行數步見一水仙
祠牆垣皆黃土中庭紫荊芬然及登殿所設像與
夜中女子無異

衛芳華鬼

聚景園

湖上園亭好重來憶舊游徵歌調玉樹闌舞按梁州徑狹
花迎輦池深柳拂舟昔人皆已沒誰與話風流

西湖游覽志餘延祐初永嘉滕穆僑居臨安月夜
游聚景園遇一美人自言衛芳華故宋理宗朝宮
人即命侍女翹翹設茵席酒果歌木蘭花一闕又
賦詩云云

鄭婉娥鬼

口占

鳳艦龍舟事已空，銀屏金屋夢魂中。
黃蘆晚日空殘壘，碧草寒煙鎖故宮。
隧道魚燈油欲盡，粧臺鸞鏡匣長封。
憑君莫話興亡事，淚濕臙脂損舊容。

列朝詩集吳江沈韶洪武初遊九江琵琶亭月下
彷彿聞歌聲明日復往有麗人冉冉而來呼韶同
茵坐曰妾僞漢婕妤鄭婉娥死殯亭側命侍兒鉶
蟬取酒口占一律贈韶韶與留連半載談元末羣
雄興廢又僞漢宮中事歷歷可記

華亭二生

全生詩

幾年兵火接天涯，白骨叢中度歲華。
杜宇有冤能泣血，鄧攸無子可傳家。
當時自詫遼東豕，今日翻成井底蛙。
一片

春光誰是主野花開滿蒺藜沙

賈生詩

漠漠荒郊鳥亂飛人民城郭歎都非河沈朽骨何須葬血
污遊魂不得歸麥飯無人作寒食綈袍有淚哭斜暉生存
零落皆如此但恨平生壯志違

列朝詩集吳元年明兵圍姑蘇上洋人錢鶴皋起
兵援張氏華亭有全賈二生參與謀議事敗皆起
水死洪武四年春華亭士人石若虛出近郊遇二
生於途忘其已死班荆酌酒二生各賦一詩揮手
別去不知所之

仙方詩

紛紛墓土黃金屑片片花飛白玉芝君主一斤臣四兩調
和服下即平夷

七修類稿元末嘉興桐鄉縣後朱村徐通判素慕洞賓朝夕供禮一日疽發於背勢垂死猶扶起禮之如昔偶見淨水盂下白紙一幅視之有詩云云意其仙方然不知何物爲黃金白玉乃召仙以大黃白芷爲問仙曰然服之果驗

晚翠亭詩

一徑入青松飛流澹晴綠道人晚歸來長歌振林谷山深不知秋落葉下枯木須臾翠煙開月色照綵服

草木子鬼作晚翠亭詩云云

荊州鬼語

苦也苦幾時泥到襄陽府 苦也苦幾時泥到成都府

草木子昔元戊寅年間荊州分域有鬼夜叫云云居人皆聞之而不見其形及早視之凡樹木不論大小皆用泥和狗豬毛離根一二尺泥之至樹分枝處則止後又改呼云云蓋古今未聞之異也

元詩紀事卷二十四

歌頌謠諺讖雜語

侯官陳衍緝

濱州民歌

田野桑麻一倍增昔無粗麻今續續太守之德如景星

松雪齋集公諱或姓姜氏知濱州課民栽桑歲餘新桑徧野人呼曰太守桑且歌云云

馬氏鐵券讖

至元十五六狗兒壞我屋

武林舊事至元十五年六月有軍廝名狗兒者因樵採墾土得一鐵券上有字云雁門馬氏葬於橫鍾橋云云後又有十字云云

信州路讖

水打巷村園永豐出狀元

江西通志篤列圖字彥誠蒙古人父揭南新祥興
間鎮信州路得一識云云遂家於永之進賢坊生
篤列圖登至順庚午蒙古榜進士第一

嘲洪起畏

家在臨安職守京口北騎若來不降則走

癸辛雜識洪起畏知京口日乃北軍入境之初嘗
大書揭榜四境云家在臨安職守京口北騎若來
有死不走其後舉郡以降或為改其末句云云

皇舅墓謠

皇舅墓門閉運糧向北去水渰墓門開運糧却回來

輟耕錄河間路景州舊縣河濟一土阜相傳為皇
舅墓自國家奄混區夏即有謠云云至正辛卯中
原大水舟行木杪間及水退土阜崩圯墓門顯露
繼後天下多事海道不通

井字謎

四十零八個頭一頭還對一脚中間全無肚腸外面許多
稜角

用字謎

三山自三山山山甘倒懸一月復一月月月還相連左右
排雙羽縱橫列二川闔家都六口兩口不團圓

敬齋古今難謎固小技倆然其諷詠比興固與詩人同義而在士大夫事中亦談笑一助嘗擬作井謎云云此未聯亦借前人語嘗聞用字謎既久止記一二句今爲足成之云云

案齊東野語用字謎云一月復一月兩月共半
上有可耕之田下有長流之川六口共一室兩口不團圓又云重山復重山重山向下懸明月復明月明月兩相連

大明寺水隱語

一堂堂兩曜垂光井深尺一點去水旁二人同行不欠

一邊三梁四柱足火然若有雙鉤日月全

湛淵靜語今杭之西大明寺亦鐫隱語於上云云乃大明寺水天下無比也

頌程雪樓

閩中有雪方爲貴天下無樓如此高

草木子程雪樓爲閩守任滿歸民有獻箭旗者以百數公於內取其一聯云云

無名狀

老書生小書生二書生壞了中書省不言不語張左丞鋪眉搨眼董參政也待學魏徵一般俸讀讀捧請倩

山居新語桑哥丞相當國擅權之時同僚張左丞董參政者二公皆以書生自稱凡事有不便者多沮之桑哥欲去之而未能是時都省告狀攬箱乃暗令人作一狀投之箱中至午收狀當日省掾須一一讀而分揀之中有一狀無人名事實但云云

甯都州民歌

去年雪今年雨微計侯那得此民既悅天應喜

江西通志計初浮梁人授甯都州同知覈板冊以定賦出冤獄以正刑上下推服謁假歸省飢民起爲亂當道檄初往諭盜遂息州久無雪民苦瘡癘復任時大雪明年早一禱輒雨民歌云云案末二句據吳草廬集增

宣城民哭邑令

公來何其遲公去何其速使我宣城民何以遂生育

江西通志尹希善吉水人被薦授宣城令有善政以病卒於官民哭之云云

雷州民歌

鴻鹵爲田兮孫父之教渠之泱泱兮長我杭稻自今有年
兮無旱無勞

元史烏古孫澤傳擢爲海北海南廉訪使雷州地近海澤行視城陰乃教民浚故湖築大堤塌三溪滌之爲斗門七堤塌大以制其贏耗醜爲渠二十有四計得良田數千頃瀕海廣瀉並爲膏土民歌之云云

浮梁民謠

桃李陰陰六萬家下居民不識官衙甘棠喜有千年政美玉終無一點瑕

江西通志郭郁大梁人皇慶間浮梁令善爲鈎距以廉民隱自比趙廣漢聘吳仲遷爲弟子師士風丕變政爲江南諸邑最民謠云云

太倉謠

打碗花子開今搬州縣來黃郎屋上走州來住不久

平江記事元貞初升崑山縣爲州州治去府治七十二里延祐中移太倉未移之先太倉江口打碗

花子遍地感開民謠云云遷移之先常有鼠郎出沒廳事上民復謠云云至正間果復移回玉峯舊治

至治間占

天狗墜地爲赤犬其下有大軍覆境

楮室記至治元年玉案山產小赤犬羣吠遍野占云云

李好文諺

目耕夜分李好文

梧溪集幼力學家苦貧夜就鄰之磨坊燈讀書凡十餘年一日值雪抵村舍媼貸斗麥粳却曰子奚拙耕好文曰吾目耕耳旣而諺云云

紹興鄉人語

欲學孝婦當學俞母

函史紹興俞新之妻聞人氏夫歿誓不貳事姑病風失明聞人手滌溷穢時時舐其目目為復明姑卒與子親負土葬之鄉人為之語云云

法服歌訣

襪履中單黃帶先襦袍蔽膝綬紳連方心曲領藍腰帶玉珮丁當冠笏全

山居新話郊祀祭廟天子御袞冕百官皆法服凡披秉須依歌訣次第則免顛倒設識歌訣於左云

明宗時童謠

牡丹紅禾苗空牡丹紫禾苗死

古今風謠

案明宗在位五月而崩廟諱乃和字也

元譏

大元之後有庚申

西湖志餘或問宋祚於邵子邵子對以五更頭蓋謂五庚申也而元讖亦云云順帝庚申生纔六庚耳

十七字詩

自謂非其子如今作天子傳語老蠻子請死

歸田詩話虞伯生際遇文宗置奎章閣爲學士順帝爲明宗子文宗忌之遠竄海南詔書有曰明宗在北之曰自以爲非其子伯生筆也文宗晏駕寧宗立八月崩國人迎順帝立之帝入太廟斥去文宗神主而令四方毀棄舊詔伯生時在江西命以皮繩拴腰馬尾縫眼夾兩馬間逮捕至大都族之者十七字詩云云至則以文宗親改詔稿呈順帝覽之曰此朕家事外人豈知遂得釋兩自由是喪明不復能楷書

函史侍臣有以詔本侍讀學士虞集所草者請罪之王嘻笑曰此我家事豈繇彼書生彼代書俯耳賜酒幣遣歸

石洲詩話田汝成西湖志餘所載順帝即位時馬尾縫眼由是喪明之事爲此說者第因文靖晚年目疾而傳會之耳予前年得宋宣和畫貓卷有文靖題云云至正五月夏仙井虞集筆勢尤蒼逸信乎前說之誣也

元統間謠

天雨鼈事不齊

元史元統二年六月彰德雨白毛俗呼云老君髯民謠云云

菩薩線謠

天雨線民起怨中原地事必變

元史至元二年二月彰德雨毛如線而俗呼云菩薩線民謠云云

京師童謠

白雁望南飛馬札望北跳

元史至元五年八月云云

京師語

上把君欺下把民虐太皇太后倚恃着

庚申外史伯顏數往太皇太后宮或通宵不出京師爲語云云

書省壁

人皆謂我不辦事天下辦事有幾人袖裏屠龍斬蛟手埋沒青鋒二十春

庚申外史至元四年冬十一月河南范孟端反孟端者河南杞縣人也始爲內臺知班發身掾河南臺其人貧無資寡交遊人皆謂不辦事鬱鬱不得志又久不得補一日大書省壁云云後有守省御史來與孟端有舊力爲言之乃得補又不幫俸孟端憾曰我必殺若輩

至正中諺

李如黃瓜民皆無家

留青日札元順帝至正中李實如黃瓜諺云云

江西福建怨謠

九重丹詔頒恩至萬兩黃金奉使回
奉使來時驚天動地奉使去時烏天黑
地官吏都歡天喜地百姓却啼天哭地
官吏黑漆皮燈籠奉使來時添一重

輟耕錄至正乙酉冬朝廷遣官奉使宣撫諸道問
民疾苦明年江右儒人黃如徵邀駕上書指數散
散王士宏等罪狀上喜特授江西等處儒學提舉
其書畧曰江西福建一道地處蠻方去京師萬里
外傳聞奉使之來皆若大旱之望雲霓而散散王
士宏等不體聖天子撫綏元元之意驚揚虎噬雷
厲風飛聲色以淫吾中賄賂以緘吾口閭閻失望
田里寒心乃歌云云又云云又云云如此怨謠未
能枚舉

石人謠

莫道石人一隻眼此物一出天下反

草木子徐州盜韓山童叛先是至正庚寅間參議賈魯以當承平之時無所垂名欲立事功於世及河決南行勸脫脫求夏禹故道開使北流身專其任溯河起集丁夫二十六萬餘人朝廷所降食錢官吏多不盡支河夫多怨韓山童等因挾詐陰鑿石人只開一眼鑄其背云云預當開河道埋之掘者得之遂相驚詫而謀亂

平胡錄一云先是河南北童謠云云及魯治河果於黃陵岡得石如謠云

七修類稿韓山童樂城人祖父以白蓮會燒香惑衆至山童因棗陽有男週歲暴長四尺鰐腹如世所塑布袋和尚者遂倡言彌勒下生天下當亂又陰鑿一眼石人埋當道鑄其背云石人一隻眼挑動黃河天下反

平江郡石上讖

三十八子寅卯年至辰巳合收張翼同爲列國不在

常不在祥切須款款細思量旦卜水幕愁米浮圖倒地莫
扶起修石岸重開河軍民拍手笑呵呵日出屋東頭鯉魚
上山遊星從月裏過會在年年頭

日聞錄至正壬辰年平江郡守六十差民言於舊
城址下得一石鐫云云訪問不得其實予後於松
江偶見前人一日錄亦載此語乃知此語不特見
於平江蓋已識於前矣

粘國門詩

蝦蟆水上浮雪雪見日消定住不開口汪家奴只一朝國
事休矣

草木子至正壬辰丞相脫脫統兵征南浦兵甫及
高郵答麻奏天下亂皆由怨脫脫之故罷脫脫盜
自宵息上入其說即軍中貶之脫脫釋兵奉詔赴
貶所兵遂大潰大率皆歸紅巾答麻復矯詔殺之
答麻與脫脫初無讎恨但欲謀其相位杜其再來
之路爾未幾答麻坐配死或以詩黏國門云云雪

雪咎麻弟爲御史大夫黨兄爲奸定住總賦江終
日酣飲而已

上海縣謠

雞啼不拍翅鴉鳥不轉更

山居新話至正癸巳冬上海縣十九保村中雞鳴
不鼓翼民謠云云

至正中大理童謠

莫道君爲山海主山海笑咳咳園中花謝千萬朵別有明
主來

至正中燕京童謠三首

牽郎郎拽弟弟打破碗兒便作地

陰涼陰涼過河去日頭日頭過山來

脚驢斑斑脚躡南山南山北斗養活家狗家狗磨麪三十

元時已事

卷二十一

（

弓箭上馬琵琶下馬琵琶驢蹄馬蹄縮了一隻

以上古今風謠

滇載記寶聞我高皇帝開基金陵遣其叔段真自會川入京奉表歸款朝廷亦以書報之時有妖巫女歌曰莫道云云寶數曰疾卒于明嗣

台溫處樹旗謠

天高皇帝遠民少相公多一日三遍打不反待如何

開中今古錄元到末年數當亂任非其人酷刑橫歛台溫處之民樹旗村落云云由是謀反者各起黃巖方谷珍因而肇亂江淮紅巾徧四方矣

方國珍謠

楊氏青出賊精

草木子方國珍台之寧海人其居有山在中曰楊氏嘗有童謠云云其初亦欲向功為國宣力後失賞遂出忿言曰蔡能為盜我豈不能耶遂叛

京師童謠

一陣黃風一陣沙千里萬里無人家回頭雪消不堪看三
眼和尚弄瞎馬

元史至正十五年二云云

松江謠

滿城都是火府官四散躲城裏無一人紅軍府上坐

輟耕錄至正丙申正月常熟州陷松江府印造官號散給吏兵佩帶以防姦偽號之製作畫爲圓圈繞圈皆火燄圈之內一府字以府印印府字上圈之外四角府官花押民間謠云云不三月城破悉如所言

張士信楊完者謠

死不怨泰州張生不謝寶慶楊

藥郊私語丁酉八月張氏以水師數萬來攻嘉興
羽檄星馳川陸戒嚴楊完者以大軍大破之斬首
萬七千級俘者數千張氏統軍張士信以伏水遁
還然完者兇肆掠人貨錢至貴家命婦室女見之
則必圍宅勒取淫汙少與相拒則指以通賊縱兵
屠害民謠云云

閩清民歌

彼寇來讎兮得吾侯而蒙休彼寇遠遁兮吾侯錫我室家
之無憂

福建通志蔡嗣宗由閩縣簿遷閩清尹邑有外寇
嗣宗募民兵却之百姓安堵乃歌云云

武岡民頌

前有公綽武岡父母今之郡侯母乃其後足我衣食安我
田畝我子我孫與侯同久

萬歷湖廣總志柳不華武岡路總管元季兵亂不
華率義屯成同保山控制蠻獠守境衛民幾二十

年邊方賴之後以疾卒民嘗頌之云云

曲沃民歌

泮宮之崇以扶儒宗社稷之封以祈年豐肇之耆誰令尹之功

山西通志閭得中至正間任曲沃首建社稷壇鼎新文廟惠愛黔黎作興人材民歌云云

書楮衾語

的的的孰令爾紙被似鈔角問我何處住五色雲中住問我是何姓杓子少個柄爾也錯我也錯不如歸去的的

霏雪錄元末有人襪被行山逕間遇惡少意所負必楮衾也擊殺之視襪特楮衾耳大悔之乃書楮衾云云懇官不知主名召商謎者問之曰五色雲綵煙也綵煙新昌山名杓子少柄孟也蓋于姓也密令隸人往蹤跡之久而不得隸人亦了事者一日坐鐺肆櫛髮見一人對門賣餅鼓其鐺作的的

之聲乃揚言曰某山中劫負紙被者官知賊處即來捕也覘其人有懼色次日閉門不賣餅矣竟捕之果服其辜

元末湖湘中童謠

不怕水中魚只怕岸上豬豬過水見糠止

元末真定童謠

塔兒白北人是主南人客塔兒紅南人來做主人公

以上古今風謠

趙烈婦歌

四月三日兵燒湖縣女多被辱與驅殉節伊誰天永姝

梧溪集趙氏鄆處士陸燾妻也至正間兩浙多虞燾與趙隱居松之飄湖丁未夏海隅有警兵猝至燾偕趙倉皇赴舟未幾同難者爭舍舟陸燾登岸傷刃者三遂仆深淖趙自投於淵時有歌之者

云云

蕭彝翁書衣帶語

男子之貞猶女之烈一有玷焉萬善難雪

江西通志寇亂家居江西參政全子仁率師平袁州辟彝翁爲參謀會僞漢陷廬陵子仁遁去彝翁歎曰有城不守非忠也遇敵弗戰非勇也謀人軍而不死何面見天下士乎投井不死爭出之三曰不食書衣帶云云竟赴井死

羊兒年謠

富漢莫起樓貧漢莫起屋但看羊兒年便是吳家國

庚申外史本朝龍興淮南即以建康爲天下根本東征西伐南誅北討四海人心歸順先是童謠云云迨本朝定都建康築壇於建康南門郊天受命改元朝至正三十七年爲吳元年實丁未歲也

黃菜葉謠

張王做事業只憑黃蔡葉一夜西風來乾鷺

翦勝野聞僞周主張士誠據有江東時姑蘇市井中童謠云云後國事既去太祖取其黃蔡葉三人者剗其腸而懸之至成枯腊蓋三人皆元戚機臣其殘膏積侈敗國喪家帝特惡焉

西樵野記僞吳嘗用黃參軍敬夫蔡參軍彥文葉參軍德新圖事三人皆迂闊書生不識大計洪武丁未春太祖下江南三人皆伏誅其屍風乾於旗竿之首初吳中謠云云

七修類稿三人黃書生蔡業醫吳星士也吳中因作云云至吳元年九月初八日癸未西風大作徐達攻破姑蘇從西門進兵

案古今風謠作黃蔡葉西風來便乾折

又案鐵崖集有蔡葉行注云張氏亡國由大弟致此實由二佞丁未春二佞伏誅於臺城風乾其尸

元詩紀事校甚凡卷中誤字旁加小黑圈為識其行數每

者只作一行算

凡例頁第十三行一詩之詩當作題

卷二第七頁三十一行和之二字誤倒 第十二頁三十行魚蠹二字誤倒 第十九頁十七行二十頁十五

行撒皆當作撒

卷三第八頁六行秦當作奏 十二頁二行後當作候

卷四第七頁十行園當作囿 第二十頁一行陵下脫

勝字

卷五第九頁二行兩當作雨三行焉當作馬 第二十

頁五行君當作居

卷六第五頁二行堂當作臺 第六頁十三行佐當作

左 第十九頁二行令當作今

卷七第十四頁十六行婦下脫謠字 第十六頁十九

行詩當作詞 第三十頁二十二行王望二字互誤

卷九第一頁二十一頁雪霏二字誤倒 第七頁十三

行堂當作臺

卷十第四頁十行瓚顛二字誤倒

卷十一第三頁十行駕當作駕 第四頁九行州下字

字衍 第九頁十一行駕當作駕 第十七頁二十一

行干當作去 第二十五頁五行闕當作聞

卷十二第二頁十七行裙當作裾

卷十四第九頁十行月當作日

卷十五第七頁十六行子當作女 第廿一頁一行故

當作鄉三行鄉當作竹

卷十六第三頁十四行署當作暑

卷十七第六頁八行前當作但 第九頁十三行荻棟

之棟當作茅

卷二十四第七頁二十行浦當作淮 第九頁十二行

藥當作樂